

tu hui a Te Tairawhiti. I whakaatu ia i tona pouri mo te iti rawa o Te Taihauauru me etahi e wawata ana o reira hei hautu mo Tainui. Mehemea i rongohangai tonu atu, penei me ia te waimarie ki te haere i roto i tenei reo pohiri a Te Tairawhiti, penei tera e mai rawa te maramatanga me te pai e ruia ki tera tai e papakirua mai ra nga tikanga i waenga parae.

Take tuarua:—

Te Whakatopu-take-paanga-whenua.

I whakamarama a Ngata i te haora i rite ai mo enei take me whakawhaiti tenei take me te take whakanohonoho, me te take moni hei awhina i nga mahi whakanohonoho i te maori ki runga i te whenua.

I whakaatu tuturu ia he nui te waimarie o te iwi ki te tae ki tenei ra. Koia enei ko nga putake hei tirotirohanga, notemea e kiia ana i roto i Te Tiriti o Waitangi kia rite te maori ki te pakeha. Mai taua wa, tae mai ki tenei ra kaore ano i peratia e te ture i raro i nga marama o Te Tiriti. Otira me ki he waimarie, penei kua puuru reiti noatu kua pakeha noatu i raro i nga tikanga e kiia nei he taumaha, he mamae kei roto i runga ano ra i te tauboutanga o te iwi maori ki era ture pakeha. Ahakoa tae mai ki tenei ra, kei te awangawanga tonu te ngakau "Ae ranei ka ora te iwi maori i roto i nga tikanga pakeha, kaore ranei."

He waimarie ra tenei te peratanga notemea e kore rawa te maori e pakeha i te kimonga kanohi. Tupono ki nga ra i a Timi ko te kaha, ko te manawanui, ka pareka ake te maramatanga pakeha i roto i tera kaumatua puta ke nei tona maramatanga, ka tiria e ia tenei kupu ki roto i te marae o te matauranga o te Ao pakeha "Taihoa! Taihoa!"

Ahakoa etahi ahuatanga i taururutu i etahi wahanga o te motu, ko etahi wahi i hapai i te ahuwhehenua hei rakau tau-toko i te iwi, tae rawa mai ki tenei wa, ki te hurihanga o te Rau Tau Tawhito ki muri, ko Te Rau Tau Hou tenei, kua pakari, ahakoa kei te ahua kopipi ano, otira kua marama me mahi, me whakanohonoho nga whenua, me ahuwhehenua te maori i roto i tenei ra, ka rokohanga te wa waimarie "The Floodtide" e ki ana te pakeha.

I whakamarama ia, i runga i te take whakatopu take paanga ka pai te takoto o nga paanga o tena o tena ara ka whaiti, ka marama hoki nga taitara, ka waiho te taumaha kei te whawha ki te mahi, kei te mahi, kei te moni hei whakamahi i aua paanga.

I runga i tena ahua ka taea te rapu atu etahi moni i runga i te watea me te marama o aua taitara.

Mo runga i te whakanohonoho whanui i te iwi ki runga te Poari, te Kaitiaki ranei hei tuku mo te whakatuputupu i te iwi e hiahia ana kia whiwhi whenua i runga i era